

IS: KDN mantapkan keupayaan pemantauan media sosial
Astro Awani
April 16, 2015

SERDANG: Rakyat Malaysia yang ditahan kerana terlibat dalam kegiatan militan Negara Islam (IS) kini meningkat kepada 95 orang.

Menteri Dalam Negeri Datuk Seri Dr. Ahmad Zahid Hamidi menegaskan pemantauan akan ditingkatkan di setiap saluran terutamanya di media sosial.

Dalam usaha mengekang penyebaran ideologi pengganas menerusi internet, Unit Jenayah Siber PDRM menjalinkan kerjasama menyeluruh dengan Polis Antarabangsa (Interpol).

“Jenayah siber sekarang ini menjadi satu cabaran baru untuk polis dan penguasa yang lain. Kami juga melihat pewujudan pejabat Interpol di Singapura dapat membantu Aseanapol untuk negara-negara Asia dan juga PDRM,” ujar beliau.

Beliau berkata demikian dalam sidang media Majlis Anugerah Perkhidmatan Cemerlang KDN 2014 di Serdang pada Khamis.

Kemudahan terkini memerangi jenayah siber dimiliki Kompleks Interpol Global di Singapura membantu PDRM yang sedang membangunkan Sistem Unit Perisikan Pusat (CIU).

Pada masa sama, warga Malaysia di luar negara yang didapati terlibat dengan kegiatan keganasan sedang dipantau.

Polis juga sedang memburu tiga rakyat Malaysia yang baru sahaja pulang daripada menyertai IS di Syria.

Copyright © Astro Awani Network Sdn. Bhd. 2015 (535275-D). All Rights Reserved.

Source: <http://www.astroawani.com/berita-malaysia/kdn-mantapkan-keupayaan-pemantauan-media-sosial-58007>